



Obraćanje prvog zamjenika visokog predstavnika i supervizora za Brčko Dennisu Hearnea na svečanosti povodom obilježavanja 18. godišnjice osnivanja Brčko Distrikta BiH

Vrijedi izgovorena riječ.

Brčko, 8. marta 2018. godine

Dame i gospodo,

Sretan Dan Brčko Distrikta.

Poštovane dame, sretan vam Dan žena.

Čast mi je i veliko zadovoljstvo da vam se danas pridružim u proslavi Dana Brčko Distrikta.

Današnja svečanost je prilika da se sjetimo dosadašnjih uspjeha, ali i da jasno sagledamo izazove koji su još uvijek pred nama.

Ovo je takođe prilika za mene da, u svojstvu supervizora za Brčko Distrikt, još jednom uvjerim sve građane Brčkog, kao i njihove izabrane zvaničnike, u svoje snažno opredjeljenje da podržavam stabilnost i održivost Distrikta. Svi želimo da Brčko nastavi svoj izuzetan rast kao zajednica u kojoj je istinska međuetnička saradnja svakodnevna praksa, a funkcionalnost vlasti prioritet. Svi mi želimo da Brčko i dalje bude primjer uspjeha za budućnost građana Distrikta, kao i pozitivan primjer za cijelu zemlju. To je posebno važno u ovom trenutku, jer postojeća situacija u Bosni i Hercegovini nije idealna.

Politička scena je turbulentna; stopa nezaposlenosti je visoka; a ulaganja su samo blijeda sjena onoga što bi moglo

biti uloženo.

A Brčko nije imuno na te probleme. Stranački interesi ponekad prevladaju opće javne interese, što dovodi do zastoja ili čime se riskira propuštanje šansi za razvoj. Usvajanje budžeta za 2018. godinu i odobravanje velikih projekata iz oblasti infrastrukture su trenutni prioriteti za Brčko i s njima bi se pravovremeno trebalo nastaviti. Da bi se to dogodilo, zajednički rad je nešto bez čega se ne može, a građani Distrikta imaju pravo da očekuju napredak.

Zahvaljujem gradonačelniku Miliću, zamjeniku gradonačelnika Domiću, predsjedavajućem Skupštine Kadriću i zamjeniku predsjedavajućeg Skupštine Filipoviću na spremnosti koju su pokazali da traže rješenja za ove goruće potrebe Distrikta, a jučer smo o tim pitanjima vodili korisne razgovore. Očekujem da ću nastaviti našu saradnju za dobrobit Brčkog.

Brčko i Bosna i Hercegovina općenito imaju ogromne šanse koje donosi napredak na putu ka EU integraciji, ali se suočavaju i sa izazovima. Najbolji odgovor na sve izazove, na državnom i na lokalnom nivou, jeste zadržavanje fokusa na reformskom programu.

Jačanje i poštivanje vladavine prava su takođe od osnovne važnosti za ovaj reformski proces, a to uključuje i iskorjenjivanje korupcije.

Napredak u Bosni i Hercegovini je usporen ne samo zbog neodgovorne politike nego i zbog rasprostranjenosti korupcije. Iz iskustva znam da se sa korupcijom može uspješno boriti - znam da ta borba bila uspješna u nekim drugim zemljama i to se može postići i ovdje.

Tokom jučerašnjeg sastanka sa gradonačelnikom i predsjedavajućim Skupštine Distrikta, sa zadovoljstvom sam primio informaciju o predstojećem usvajajućem antikorupcionih zakona koji će osigurati okvir za borbu protiv korupcije.

Uvjerjen sam da u ovoj oblasti Brčko ima potencijal da uspješno predvodi ostatak Bosne i Hercegovine, da još jednom posluži kao inspiracija i kao primjer.

Vjerujem u uspjeh Distrikta. Uvijek ću vam biti prijatelj i podrška na tom putu. Čestitam vam vaš dan. Hvala.